

## ULASAN TAHUNAN KETUA PEGAWAI EKSEKUTIF



Assalamualaikum dan Salam Sejahtera.

Saya dengan sukacitanya membentangkan Laporan Tahunan Suruhanjaya Syarikat Malaysia (SSM) tahun 2021. Tahun ini merupakan tahun kedua negara kita mengharungi cabaran pandemik COVID-19. Walau bagaimanapun, kita bersyukur kerana Program Imunisasi COVID-19 Kebangsaan (PICK) yang dilaksanakan segera telah berjaya mengekang penularan wabak ini dan seterusnya membawa kepada pengoperasian semula sektor perniagaan untuk menyokong proses pemulihan ekonomi negara.



**YBHG. DATUK NOR AZIMAH BINTI ABDUL AZIZ**  
Ketua Pegawai Eksekutif  
Suruhanjaya Syarikat Malaysia

Pada tahun 2021, kita dapati pemulihan dari aspek memulakan perniagaan mula berlangsung di mana sebanyak 384,300 perniagaan yang merangkumi 350,195 perniagaan milikan tunggal dan 34,105 perniagaan perkongsian telah didaftarkan bermula 1 Januari 2021 sehingga 31 Disember 2021. Manakala sebanyak 3,646 perkongsian liabiliti terhad dan 45,416 syarikat yang merangkumi 22 syarikat asing telah diperbadankan dalam tempoh yang sama. Statistik ini menyumbang kepada jumlah keseluruhan sebanyak 8,285,467 perniagaan, 30,252 perkongsian liabiliti terhad dan 1,434,323 syarikat yang telah didaftarkan sehingga 31 Disember 2021.



Pada tahun 2021 juga, SSM meneruskan usaha dalam memuktamadkan draf-draf Rang Undang-Undang Syarikat (Pindaan) dan Rang Undang-Undang Perkongsian Liabiliti Terhad (Pindaan) dan akan dibentangkan di sesi Parlimen terdekat pada tahun 2022. Rang Undang-Undang (RUU) ini bertujuan untuk memperkasa dan menambah baik kerangka perundangan sedia ada berkaitan rehabilitasi korporat untuk membantu syarikat yang menghadapi masalah kewangan. RUU ini juga

## ULASAN TAHUNAN KETUA PEGAWAI EKSEKUTIF

mbolehkan syarikat yang menghadapi masalah kewangan tetapi mempunyai kemampuan untuk terus berdaya saing memasuki rehabilitasi dengan pemiutang melalui cadangan pindaan yang bersifat fasilitatif, antaranya adalah seperti berikut:

(a) meluaskan pemakaian Mekanisme Penyelamat Korporat sedia ada iaitu perkiraan sukarela korporat (*corporate voluntary arrangement*) dan pengurusan kehakiman (*judicial management*) kepada lebih banyak kategori syarikat termasuk syarikat awam yang disenaraikan (*public listed company*);

(b) menambah baik peruntukan berkaitan Skim Perkiraan atau Kompromi (*Scheme of Arrangement*) dengan menyediakan prosedur yang lebih efisien bagi membolehkan syarikat mendapatkan perintah halangan daripada tindakan penggulungan atau perundangan oleh pemiutang;

(c) memberikan kuasa kepada Mahkamah untuk meluluskan Skim Perkiraan atau Kompromi dengan memastikan hak-hak pemiutang minoriti tidak diprejudis;

(d) membolehkan syarikat yang telah memasuki Skim Perkiraan atau Kompromi atau yang telah mendapat perintah pengurusan kehakiman mendapatkan pembiayaan penyelamat (*rescue financing*) serta memberikan perlindungan terhadap pembiaya tersebut; dan

(e) menyediakan peruntukan yang melindungi pembekalan perkhidmatan atau barangan penting (*supply of essential goods and services*) kepada syarikat yang telah memasuki proses rehabilitasi.

Terdapat sejumlah 25 cadangan pindaan untuk diperkenalkan di dalam RUU ini yang merupakan penambahbaikan penting untuk membantu sektor korporat yang menghadapi masalah kewangan, terutama sekali akibat dari kesan pandemik COVID-19 serta melaksanakan peranan SSM dalam menyokong inisiatif berterusan Kerajaan untuk memulihkan ekonomi negara. SSM juga meneruskan usaha memuktamadkan RUU Perkongsian Liabiliti Terhadap (Pindaan) 2021 (RUU PLT). Pindaan yang dicadangkan antaranya bertujuan untuk memperkenalkan keseluruhan kerangka Mekanisme Penyelamat Korporat di dalam Akta Syarikat 2016 serta pindaan-pindaan yang berkaitan untuk turut terpakai ke atas PLT. Rang Undang-Undang ini bertujuan untuk menambah baik kerangka perundangan sedia ada berkaitan rehabilitasi korporat bagi PLT. Penambahbaikan serta pindaan untuk memperluaskan pemakaian perundangan berhubung Mekanisme Penyelamat Korporat ini akan membantu PLT yang menghadapi masalah kewangan memohon proses rehabilitasi korporat agar PLT boleh terus beroperasi (*stay afloat*).

Tanpa kerangka perundangan yang komprehensif berkaitan Mekanisme Penyelamat Korporat, entiti perniagaan seperti syarikat dan PLT akan menghadapi risiko untuk diambil tindakan penggulungan sekiranya mereka berdepan dengan masalah kewangan walaupun perniagaan tersebut pada hakikatnya masih berdaya maju. Dengan pindaan ini, mana-mana PLT yang menghadapi masalah kewangan sementara tetapi masih berkemampuan serta berdaya saing boleh

## ULASAN TAHUNAN KETUA PEGAWAI EKSEKUTIF

memanfaatkan Mekanisme Penyelamat Korporat dengan memasuki pelan rehabilitasi dengan pemiutang mereka. Inisiatif ini adalah penting untuk membantu PLT yang menghadapi masalah kewangan, terutama sekali akibat dari kesan pandemik COVID-19 agar kekal beroperasi dan menjana ekonomi negara.

Pada tahun 2021, SSM juga meneruskan usaha untuk mencadangkan pengenalan Rang Undang-Undang Harta Alih Kepentingan Bercagar (RUU HAKB). Cadangan pengenalan RUU HAKB ini bertujuan mengatasi jurang perundangan di Malaysia supaya entiti perniagaan dapat memanfaatkan harta alih yang dimiliki dan dijadikan kolateral/sandaran bagi mendapatkan pembiayaan untuk mengembangkan lagi perniagaan. Bagi cadangan ini, Memorandum Jemaah Menteri (MJM) RUU HAKB ini telah dibentangkan di Mesyuarat Jemaah Menteri pada 17 Februari 2021 di mana Jemaah Menteri telah bersetuju bahawa RUU HAKB digubal bagi tujuan pendaftaran dan pengawalseliaan kepentingan bercagar bagi harta alih di Malaysia. SSM menjadi agensi yang bertanggungjawab mentadbir kerangka perundangan HAKB dan mengawal selia aktiviti berhubung pendaftaran cagaran harta alih.

Berikutan itu, draf RUU HAKB telah disediakan bagi mengawal selia pendaftaran dan penguatkuasaan hak terhadap harta alih yang digunakan sebagai sekuriti kepentingan atau cagaran bagi mendapatkan pinjaman, pembiayaan atau menjalankan suatu obligasi.

Draf RUU tersebut yang merangkumi 108 peruntukan perundangan yang berdasarkan kepada 23 kenyataan polisi telah diluluskan oleh Kabinet dan sedang dimuktamadkan untuk proses penyerahan seterusnya kepada pihak Jabatan Peguam Negara.

**Tahun 2021 juga telah melakar sejarah kepada SSM dengan penganjuran Persidangan Kebangsaan SSM kali ke-10 dengan tema 'Governing Under New Normal' yang telah diadakan pada 24 Ogos 2021 secara virtual. Persidangan ini telah dirasmikan oleh YBhg. Datuk Seri Hj. Hasnol Zam Zam Hj. Ahmad, Ketua Setiausaha KPNDHEP yang juga merangkap Pengerusi SSM. Buat pertama kalinya sejak mula diperkenalkan pada tahun 2011, Persidangan Kebangsaan SSM 2021 telah dihoskan melalui platform persidangan maya**

**yang membenarkan perwakilan menyertai empat (4) sesi plenari serta berinteraksi di *networking lounge* dan reruai pameran.**

Persidangan ini telah dihadiri oleh seramai 2,049 peserta yang merupakan kehadiran tertinggi pernah direkodkan oleh SSM. Para peserta terdiri daripada pengamal sektor korporat dan perniagaan yang terdiri daripada ahli lembaga pengarah syarikat, setiausaha syarikat, pengamal undang-undang, ahli ekonomi dan kewangan, usahawan, ahli akademik dan pihak-pihak berkepentingan yang berkaitan termasuk peserta luar negara iaitu dari Pakistan, Republik Macedonia, Kazakhstan, Filipina dan Singapura.

Tidak lupa juga penganjuran Dialog Tahunan SSM 2021 yang telah diadakan pada 23 November 2021 secara dalam talian. Sesi dialog pada tahun ini telah dihadiri lebih 500 orang peserta yang merupakan setiausaha syarikat dan pembantu setiausaha syarikat dari negeri Kelantan, Terengganu, Pahang, Sabah dan Sarawak.

Dialog Tahunan SSM merupakan salah satu inisiatif tahunan SSM bagi mewujudkan hubungan strategik di antara SSM dengan pihak-pihak berkepentingan. Ia merupakan salah satu program bersasar yang menyediakan platform bagi SSM untuk memperjelaskan isu-isu yang dibangkitkan oleh pihak-pihak berkepentingan meliputi skop operasi dan penguatkuasaan. Dialog Tahunan ini juga merupakan usaha SSM untuk mengenal pasti dan mendapatkan pandangan berhubung polisi dan perkhidmatan yang perlu ditambah baik.

### ULASAN TAHUNAN KETUA PEGAWAI EKSEKUTIF

Pada 19 November 2021, Jabatan Perangkaan Malaysia (DOSM) dan SSM telah menandatangani Memorandum Persefahaman (MoU) untuk meneruskan kerjasama strategik serta memperkasakan lagi kolaborasi sedia ada antara kedua-dua agensi.

**MoU kali kedua bersama SSM ini diadakan bagi memperbaharui MoU pertama yang ditandatangani pada tahun 2009. Melalui kerjasama semasa ini, DOSM akan meneruskan perkongsian maklumat-maklumat berkaitan Piawaian Klasifikasi Industri Malaysia (MSIC) yang berasaskan kepada *International Standard Industrial Classification of All Economic Activities (ISIC)*, mengadakan kursus dan taklimat berkenaan statistik yang diperlukan oleh SSM serta pembekalan statistik rasmi lain kepada SSM.**

SSM diberi penghormatan atas pelaksanaan Sistem Pengurusan Anti-Rasuah (SPAR) oleh SIRIM QAS International Sdn Bhd (SIRIM) pada 5 Oktober 2021. Berikutan itu, Sijil Pengiktirafan Standard Malaysia (MS) ISO 37001: 2016 ABMS telah disampaikan oleh SIRIM kepada YBhg. Datuk Seri Hj. Hasnol Zam Zam Hj. Ahmad, Ketua Setiausaha KPDNHEP merangkap Pengerusi SSM.

Rentetan daripada itu, bersempena dengan Sambutan Hari Integriti Kebangsaan 2021, SSM telah menganjurkan Sambutan Hari Integriti 2021 peringkat SSM iaitu pada 7 Disember 2021 yang bertempat di Auditorium Tun Dr. Siti Hasmah, Menara SSM@ Sentral secara fizikal dan dalam talian. Sambutan Hari Integriti SSM ini telah dirasmikan oleh YBhg. Datuk Seri Hj. Hasnol Zam Zam Hj. Ahmad, Ketua Setiausaha KPDNHEP merangkap Pengerusi SSM. Pada majlis yang sama, Buku Kod Etika SSM 2021 yang dikemaskini juga telah dilancarkan.

Dalam usaha SSM untuk membantu mengurangkan beban dan tekanan komuniti perniagaan serta sektor korporat

yang terkesan akibat pandemik COVID-19, SSM meneruskan beberapa inisiatif yang telah diperkenalkan pada tahun 2020 serta turut memperkenalkan inisiatif baharu. Inisiatif ini menunjukkan sokongan berterusan SSM bagi memastikan peniaga dan sektor korporat berdaya tahan dan seterusnya berdaya saing untuk menjana aktiviti ekonomi dalam tempoh penularan wabak ini. Inisiatif-inisiatif SSM untuk mengurangkan beban sektor korporat dan perniagaan adalah seperti berikut:

(a) Memperkenalkan Skim Pendaftaran Perniagaan Prihatin (SPPP) yang memberikan pendaftaran perniagaan secara percuma kepada usahawan kumpulan B40 dan pelajar IPT sepenuh masa. Bermula pada 1 Januari 2021 sehingga 31 Disember 2021, sebanyak 26,302 pendaftaran perniagaan secara percuma telah dimanfaatkan oleh usahawan kumpulan B40 dan pelajar IPT sepenuh masa;

(b) Meneruskan pelaksanaan Skim 1 OKU 1 Perniagaan (S101P). Sejumlah 1,752 pendaftaran perniagaan di bawah S101P telah direkodkan bagi tempoh 1 Januari 2021 sehingga 31 Disember 2021;

(c) Melanjutkan tempoh masa pendaftaran SSM BizTrust secara percuma sehingga 31 Disember 2021. Sejak dari pengenalan pendaftaran SSM BizTrust secara percuma sehingga 31 Disember 2021, sebanyak 820,753 entiti perniagaan secara fizikal telah didaftarkan dengan SSM BizTrust melalui inisiatif terbaharu ini;

(d) Memberi pengecualian kompaun atas kelewatan pembaharuan dan kelewatan mendaftarkan perniagaan sehingga 31 Disember 2021. Dari 1 Januari 2021 sehingga 31 Disember 2021, sebanyak 518,911 perniagaan telah mendapat pengecualian kompaun atas kelewatan pembaharuan perniagaan manakala 3,876 perniagaan telah memanfaatkan pengecualian kompaun atas kelewatan mendaftarkan perniagaan;

(e) Mengurangkan kompaun sehingga 90% daripada nilai asal bagi permohonan pembatalan nama syarikat di bawah seksyen 549/ 550 Akta Syarikat 2016 sehingga 31 Disember 2021. Berdasarkan rekod, kompaun pembatalan nama syarikat di bawah seksyen 549/ 550 Akta Syarikat 2016 bagi tempoh 1 Januari 2021 sehingga 31 Disember 2021 adalah sebanyak 27,105 notis, 6,355 syarikat dan 8,574 pengarah;

## ULASAN TAHUNAN KETUA PEGAWAI EKSEKUTIF

(f) Menaikkan nilai ambang keterhutangan dari RM10,000 kepada RM50,000 berkuat kuasa 1 April 2021 sebagai satu nilai ambang baharu yang kekal setelah mengambil kira ketidakpastian keadaan ekonomi global dan dalam negara akibat kesan pandemik COVID-19. Inisiatif kenaikan nilai ambang keterhutangan dari RM10,000 ke RM50,000 telah berjaya menunjukkan penurunan yang ketara dalam jumlah petisyen penggulungan yang diserahkan ke SSM;

(g) Mengiktiraf semua 20 mata *Continuing Professional Education* (CPE) setahun yang dikumpul melalui latihan secara dalam talian bagi tujuan pembaharuan Sijil Perakuan Amalan Setiausaha Syarikat bermula 1 Januari 2021. Sebanyak 4,045 permohonan pembaharuan Sijil Perakuan Amalan Setiausaha telah diterima dan diluluskan melalui sistem *e-Secretary* mulai 1 Januari 2021 sehingga 31 Disember 2021;

(h) Mencadangkan pindaan bagi menambah baik peruntukan-peruntukan di bawah Akta Syarikat 2016 berkaitan Mekanisme Penyelamat Korporat dan Skim Kompromi atau Perkiraan;

(i) Memperkenalkan peruntukan-peruntukan berkaitan Mekanisme Penyelamat Korporat di bawah Akta Perkongsian Liabiliti Terhad 2012;

(j) Memperkenalkan moratorium 30 hari selepas tamat tempoh *Total Lockdown* untuk menyerah simpan dokumen berkanun di bawah Akta Syarikat 2016 dan Akta Perkongsian Liabiliti Terhad 2012 dengan pengecualian fi lewat serah simpan. Dari 1 Jun 2021 hingga 31 Disember 2021, sebanyak 208,367 transaksi telah mendapat pengecualian fi lewat serah simpan; dan

(k) Melanjutkan masa sehingga 90 hari bagi syarikat dengan tahun kewangan berakhir 1 November 2020 hingga 31 Januari 2021. Sejak mula diperkenalkan sehingga 31 Julai 2021, inisiatif ini telah berjaya memberi manfaat kepada sejumlah 102,743 syarikat yang mempunyai tahun kewangan berakhir pada 1 November 2020 hingga 31 Januari 2021.

Di samping menyediakan pelbagai inisiatif untuk membantu sektor korporat dan perniagaan yang terkesan dengan pandemik COVID-19, SSM juga telah mengambil pelbagai inisiatif bagi membantu meringankan beban mangsa-mangsa banjir yang terkesan akibat bencana banjir yang melanda negara pada 23 Disember 2021. Antara inisiatif bantuan yang diberikan adalah penggantian semula sijil perakuan pendaftaran perniagaan yang musnah akibat bencana banjir secara percuma, penubuhan Skwad Bantuan Kilat bagi membantu kerja-kerja pembersihan rumah yang terjejas akibat banjir dan sumbangan barangan keperluan asas bernilai RM100,000 kepada Pusat Perpindahan Sementara (PPS) untuk membantu meringankan beban yang dihadapi oleh mangsa-mangsa banjir. Segala inisiatif yang diambil adalah sebagai menyahut seruan Kerajaan agar semua pihak berganding bahu untuk membantu dan menyumbang ke arah kesejahteraan di bawah konsep 'kebersamaan' Keluarga Malaysia.

Di kesempatan ini, saya ingin menzahirkan setinggi penghargaan dan ucapan terima kasih kepada Yang Berhormat Menteri, Pengerusi serta Anggota Suruhanjaya atas sokongan yang berterusan sepanjang tahun 2021. Juga setinggi-tinggi penghargaan dan jutaan terima kasih diucapkan kepada semua warga kerja SSM yang telah menunjukkan komitmen yang tidak berbelah bahagi, sentiasa bekerjasama dan berusaha untuk menyediakan perkhidmatan terbaik kepada pihak berkepentingan walaupun dalam persekitaran kerja yang amat mencabar akibat pandemik COVID-19 bersesuaian dengan tema Laporan Tahunan SSM 2021 iaitu "**Membantu Pemulihan Negara.**"

**YBHG. DATUK NOR AZIMAH BINTI ABDUL AZIZ**

*Ketua Pegawai Eksekutif*

*Suruhanjaya Syarikat Malaysia*